

Te Rorohiko

nā Tipene Watson

Amokura

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.

He whakarāpopoto

Pānuitia te whakarāpopoto ki te ākonga. He aha ngā wāhanga o te rorohiko?

He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatītina rawa te pūkenga tiro whakamua. Matapakihia ngā kupu hou me te āta whakamahi i te papa kupu me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia me te ākonga mēnā he rorohiko tāna kei te kāinga. He ture anō e pā ana ki te whakamahi i te rorohiko? He aha tāu mahi ki te rorohiko?

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tātari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana mā te whai i tētahi o ngā huarahi e whai ake nei:
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuetanga o te pakiwaitara, arā, te kaupapa, te ritenga, ngā ariā mātua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapai hoki, i te wā o te whakataki.



Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini kōpae puoro, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te kaupapa o tēnei pukapuka?
2. Ka whakamahia te pūrere rorohiko ki te aha?
3. He aha te mahi a te papa pātuhi?
4. He aha te tikanga o te kiore?
5. He aha ngā mea papai o te rorohiko?

Ngā whakautu ki ngā whakapuaki māramatanga

1. He kōrero mō ngā wāhanga o te rorohiko.
2. Ki te hiko.
3. He hoatu tohutohu ki te rorohiko, tuhituhi kupu hoki.
4. He nekeneke i te kaitiri.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā te ākonga. Tirohia ngā whārangi kei te Tirohanga Whānui mō ngā tino āhuetanga o te pukapuka nei.

Te pūtake

T He rapu mōhio mai i te tuhinga pono.

He whakatakinga ā-roro, he whakaharatau

I mua i te pānui pukapuka, matapakia me pēwhea te whakakā i te rorohiko kia tīmata ai te mahi.

Kia oti i te ākonga te pānui pukapuka, kōrerotia, whakawaiwaitia hoki te rererenga kōrero “Anei te_____.”

Matapakia ngā kupu hou ki te ākonga. Hangaia tētahi rorohiko me ngā pouaka, ā, whakaingoatia ngā wāhanga o te rorohiko.